

KONGSI ILMU KEUSAHAWANAN

Kongsi ilmu keusahawanan

Pelajar kolej komuniti, politeknik berpeluang teroka asas perniagaan di Batam, Indonesia

SUNGAI PETANI – Pengalaman dan pendedahan berkaitan keusahawanan di peringkat global diberikan kepada 13 pelajar kolej komuniti serta politeknik melalui Program Pengantarabangsaan Keusahawanan ke Politeknik Negeri Batam di Indonesia, baru-baru ini.

Pegawai Keusahawanan Kolej Komuniti Sungai Petani (KKSP), Dayang Suhaila Abd Rahim berkata, hasil kunjungan yang dilakukan KKSP bersama Politeknik Seberang Prai ke pusat pengajian itu pada 17 hingga 22 Julai lalu diyakini mampu mewujudkan ikatan persefahaman.

"Hasil lawatan ke kawasan persekitaran dan suasana pembelajaran di sana mendapati peluang untuk mewujudkan kolaborasi dalam bidang keusahawanan begitu terbuka luas.

"Kunjungan yang disertai 23 penyarah dan 13 pelajar dari kedua-dua institusi ini bagaimanapun bertujuan mendapatkan pengalaman selain perkongsian ilmu serta idea-idea baru yang boleh diterokai.

"Kita juga yakin kunjungan ini dapat memantapkan kerjasama antara



Antara kunjungan dan aktiviti sepanjang Program Pengantarabangsaan Keusahawanan antara Kolej Komuniti Sungai Petani dan Politeknik Seberang Prai ke Politeknik Negeri Batam di Indonesia.

KKSP, Politeknik Seberang Prai dan Politeknik Negeri Batam, Indonesia," katanya.

Antara kunjungan lain termasuklah ke Politeknik Tourism Batam, Yayasan Pendidikan Ibnu Sina dan Panti Asuhan Yayasan Miftahul Hasanah di Kampung Melayu Nongsa yang merupakan penempat-

an 30 anak-anak yatim dan miskin.

"Kunjungan dibawa melawat ke Politeknik Tourism Batam yang mana sesi lebih serius berkaitan kolaborasi antara ketiga-tiga pihak dibincangkan dalam usaha mewujudkan kerjasama lebih efektif dan menguntungkan semua pihak.

"Lebih menguja, Politeknik

Tourism Batam turut menawarkan tempat pengajian kepada pelajar kolej komuniti sekiranya berminat menyambung pengajian peringkat Diploma Kulineri dan Operasi Perhotelan.

"Marakala di Yayasan Ibnu Sina, pihak kami berkongsi idea tentang pelaksanaan keusahawanan di institusi

masing-masing dan pendedahan tentang 'business matching' yang melibatkan ketiga-tiga institusi," katanya.

Bagi melengkapkan lawatan, Program Pengantarabangsaan Keusahawanan diteruskan ke Panti Asuhan Yayasan Miftahul Hasanah dengan memperkenalkan kursus pendek penghasilan mi kuning dan pes tomyam kepada penghuni serta penduduk setempat.

"Sebuah mesin pembuatan mi juga diserahkan kepada komuniti terbabit dengan harapan mereka dapat menggunakan sebaik mungkin bagi menjana pendapatan.

"Selain itu, satu Kursus Pendek Pengurusan Jenazah juga dianjurkan buat kaum lelaki bagi memperkembangkan ilmu berkaitan pengurusan jenazah dalam kalangan masyarakat di situ," katanya.

Kunjungan terbabit bagaimanapun diharap mampu menambah baik sistem pengajaran dan pembelajaran subjek keusahawanan agar lebih efisien sekali gus platform terbaik sebagai pendedahan baru dalam bidang keusahawanan.